

EDISOÑO PHARAOH ESIT

Exodus 6:1-13; 7:1-13

QYQHỌ UKPEP-ÑKPỌ 52

Eke Ikpọ Owo

IKỌ IBUOT: “Ndien emi edi ikpe oro, ete, uñwana ama edi ke ererimbot, edi owo emama ekim ekan uñwana; koro utom mmọ ọdiọkde” (John 3:19).

I Abasi Ọtọñọ Ntak Etiñ Ọsọñọ Ọnọ Moses Ye Israel

- 1 Abasi ọtọñọ ntak etiñ ọsọñọ ọnọ Moses ete ke eyenyaña Israel ke utibe usuñ esio ke Egypt, Exodus 6:1
- 2 Abasi ayarade Idem Esie ke enyiñ emi, Jehovah, Exodus 6:2, 3; 3:14; Genesis 17:1; 35:11; Isaiah 52:4-6; Jeremiah 16:21
- 3 Abasi edemere ediomu emi Enye ọkọñwọñọde ọnọ Moses, ke ama okokop mme akam nditọ Israel emi ekefikde, Exodus 6:4, 5; 2:23-25; 3:7; 4:30, 31
- 4 Abasi ọdọhọ Moses ete ọtọñọ ntak etiñ mme eñwọñọ Esie ọnọ Israel, Exodus 6:6-8; Numbers 23:19; 1 Ndidem 8:56; Ñwede Mbon Rome 4:21
- 5 Edinuaha Spirit nditọ Israel emi efikde anam Moses eneñere oyom uñwam Abasi akan, Exodus 6:9-12; Psalm 73:2

II Editọñọ Ntak Ndemere Utom Emi Abasi Ọkọdọñde Moses Ye Aaron

- 1 Abasi edemere utom emi Enye ọkọdọñde Moses, Exodus 6:13; Utom Mme Apostle 7:35; Isaiah 49:13-16
- 2 Enim Aaron nte anditiñ ikọ ke itie Moses nte Abasi ọkọñwọñọde, Exodus 7:1, 2; 4:14-16
- 3 Abasi ọtọñọ ntak etiñ ọnọ Moses nte edinam Pharaoh editiede, Exodus 7:3, 4; 3:19, 20
- 4 Abasi etiñ ọnọ Moses ete ke ntak edinam Pharaoh kpukpru nditọ Egypt eyefiok ebaña Abasi Israel, Exodus 7:4, 5

III Edida Ke Iso Pharaoh Ye Akakan Odudu Abasi Israel

- 1 Moses ye Aaron enam uyo Abasi, Exodus 7:6, 7
- 2 Enam idiọñọ ndiñwam Pharaoh ọfiok odudu Abasi, Exodus 7:8-10
- 3 Satan ada mme isuñ-utom esie, Jannes ye Jambres nditimere nditọ Egypt, edi Abasi Israel edi akakan, Exodus 7:11, 12; 2 Timothy 3:8, 9; 2 Ñwede Corinth 4:3, 4; 2 Ñwede Thessalonica 2:7-12; Matthew 24:24; Eriyarare 13:12, 13; 16:13, 14
- 4 Esoñọ Pharaoh esit ndisin Abasi, Exodus 7:13, 3; 8:15, 19, 32; 9:7, 12, 34, 35; 10:1, 20, 27; 14:8, 17, 18; Mme Ñke 28:14; 29:1; Mme Hebrew 3:13.

SE EKPEPDE EBAÑA

Abasi ama enyene ntak ke usuñ emi Enye akadade osio nditọ Israel ke ufin ke isoñ Egypt. Itie ufin emi ama ebighi onyuuñ ọsọñ eti-eti ndien ke akpatre ama anam nditọ Israel emum mmum enyuuñ etua ekot Abasi eyom ufak. Ke ini akam mmọ okosimde Abasi, Enye ama ọbọrọ onyuuñ ọdọñ Moses ndida mmọ usuñ ñka Canaan. Imekeme ndidọhọ ete ke ọkpọsọñ itie ufin oro ama ọfọn ye nditọ Israel koro ama ada mmọ ekpere Abasi. Mme utibe-ñkpọ ye mme ufen ekedi ndida ñwut nditọ Israel, ye ererimbot, odudu akwa Abasi ye ebuana ye ukpeme ke abaña ikọt Esie.

Abasi, ke editọñọ ntak ndemere utom emi Enye ọkọdọñde Moses, ama ọdọñ enye ọkọdọhọ nditọ Israel ete ke mmọ edi akpan inyene enọ Jehovah Abasi mmọ. Ekenọ mmọ utibe ifet emi oto ke eñwọñọ emi Abasi ọkọñwọñọde ọnọ Abraham, onyuuñ edi koro Abasi ekemekde Israel nte idut emi editode ke mmọ Enye ọnọ ofuri ererimbot mme ewuhọ Esie; ñko, ke ndidian do, man Enye ọdọñ eyen Esie, kpa Messiah emi edinamde uduak erifak owo qyqhọ.

Erifak nsio ke Egypt ekenyene ndida itie ke utọ usuñ emi mididaha ukpono ye itoro inọ baba owo kiet. Abasi okoyom ndida ñkoñ-ñkoñ ye ọkpọsọñ ubọk mfak nditọ Israel ke usuñ eke Enye amade, man oro edi ntiense ọnọ odudu Abasi, idighe ye nditọ Israel ikpọñ edi kpa ye ofuri ererimbot nde.

Kiet ke otu mme usuñ ndida mfiok nte Abasi akayararede Idem ye odudu Esie ọnọ nditọ Israel ke utọ ini emi ekedi ata ọyọhọ ediyarade edisana enyiñ Esie. Abraham, Isaac ye Jacob ye ofuri ererimbot ñko ema edioñọ Abasi nte Abasi Andikpon ñkan ye nte Abasi Andibot kpukpru ñkpọ; edi mi Enye ama ayarade Idem Esie ọnọ Moses ye nditọ Israel nte Jehovah, emi owutde edisana uwem Esie akan kpukpru mme enyiñ efen emi efiokde Enye ke Ikọ Abasi.

Mme enyiñ Abasi enyene se edade enọ etiene usuñ nte etiñde ebaña. Mi ye nte edide ke ofuri Ikọ Abasi, baba ikọ kiet iduhe emi ewetde ntre-ntre, me emi esinde ke minyeneke ntak. Ñwọrọ-nda usuñ emi etomode mme nsio-nsio enyiñ Abasi owut uduak Abasi onyuñ enyene ntak, nnyin ikemeke nditiñ utuñọ esie ọyọhọ-ọyọhọ, edi nte nnyin isañade iduk ke utuñọ esie kiet-kiet enọ nnyin mme edidioñ emi okponde akan ye ntọtunọ ifiok ke abaña akwa ima Abasi nnyin. Usuñ nte ekotde ndisana enyiñ emi ayarade owut edidiana-kiet ke ufọt mme andiwet ediwak ñwed emi edude ke Edisana Ñwed Abasi.

Akpa edikot enyiñ Abasi ke ñwed Abasi ọtọñọ ke akpa ufañ ke ñwed Genesis. “Ke eritọñọ **Abasi**. . . .” Ekabare ikọ emi eto ke usem Hebrew **Elohim** emi ekotde ini 2,270 ke Akani Ediom. Ekot ntre ke uwak esie, do ke ukpep-ñkpọ mbuot Abasi ita ke kiet ayarade, edi ke ndikot enye nte kiet ayarade owut edidiana-kiet ke edinam kpukpru mme mbuot Esie. (Kot ke 1 John 5:7). Emi onyuñ owut ubom ukeme ye akakan odudu Esie. Ñko enye owut ubọñ Abasi, owut odudu edibot ye ukara, Andikara kpukpru ñkpọ, emi okoñde akan ye odudu ye ukeme ndinam nnyuñ nnim ediom Esie.

El-Shaddai edi enyiñ efen emi ererimbot ekedioñode Abasi, ndien edikabare esie edi **Abasi Andikpon ñkan**. Emi edi enyiñ emi ekotde ke Exodus 6:3, enyiñ emi edi se mme ete emi eketọñode ukpono Abasi ekekotde Abasi. Okposuk edi enyiñ emi **Elohim**, odomode ndiwut ubom ye idaha Abasi Andikara kpukpru ñkpọ, edi akpan ñkpọ eke enye otimde owut edi idaha Abasi nte Enye emi ọnọde onyuñ añañade uwem ye edidioñ, Enye emi ekemede ke kpukpru ñkpọ onyuñ ọnọ kpukpru ñkpọ ke mfọn. Enye owut nte mme inyene ye uyọhọ mfọn Esie mikemeke ndikure, Abasi emi kpukpru nti ñkpọ ye enọ emi ọfonde ama etode.

Ke emi nnyin imokut ite ke mme idut ererimbot ekedioñọ Abasi ke mme enyiñ iba emi, edi ke ini emi akpan akpan, Enye ama ọtọñọ ndikot ikọt Esie ndianare nnyuñ ññwaña nnọ mmọ saña-saña ediyarade mfọn Esie. Enye anam emi ke nditim ñwut mmọ idem Esie ye ke ndiyarare ñwut mmọ nsinsi ye edisana idaha Esie. Edi ata akpan ñkpọ ndikut nte ke enam emi, idighe ke ini akwa edidioñ ye se ibietde uforo eke spirit me eke obukidem, edi, edi ke ini afanikọñ ye ufik, ke ekperede enyene-ndik ediyarade odudu ye edisana-ido Abasi ke Obot Sinai. Idighe ndina ke bed mfri-ukem ye ifure ke “edimenere idaha nnyin,” edi edito ke ọkpọsọñ utom emi odude ke usuñ emi, ubiak, ye nsinere ekọñ ke Abasi esik ekpere nnyin.

Enyiñ oro, **Jehovah**, emi ekabarede **QBQÑ** ke Akani Ediom (ewet kpukpru mme leta esie ke akamba, man owut ukpuhọre nte ekotde ke usem mme Hebrew, Adonai) edi enyiñ emi Abasi akayararede ọnọ Moses ke ini emi Israel ekedude ke ọkpọsọñ idomo ke Egypt. Ekenọ enyiñ oro saña-saña ke ini oro ke ufọn nditọ Israel. Ekot enyiñ emi ini 6,823 ke Akani Ediom, ndien emi owut Enye Emi odude uwem ke Idem Esie emi enyenede ke Idem Esie ata uwem emi onyuñ odude ke nsinsi. Enye owut ete Abasi ke Idem Esie odu — ndien Enye ikpọñ odu — onyuñ edi nnen-nnen enyiñ ata Abasi, edi akananam owo ikotke enye idian ye ikọ emi **ata**, nte edide ye eke **Elohim**, koro akanam owo ikotke **Jehovah** idian enyiñ efen ke mibọhọke ata Abasi. Enye emi edide ñkukure Abasi, kpukpru nti edinam ye eke spirit emi etode Abasi etim eyarade ete ke enyene Jehovah.

Mme Jew ekeda enyiñ emi ke ata edisana, anam mmọ ema efehe ndik ndikot enye, ndien tutu osim emi, mmọ iwetke inyuñ ikotke enyiñ Jehovah ke synagogue mmọ. Utu ke ndikot enyiñ emi **Jehovah** ke mme ederi mmọ, mmọ ema ekabare ekot Adonai, mme ikọ mme Hebrew efen emi ọwọrọde **Enyiñ Oro**. Ke ntre nte ekesikotde Jehovah ke eritọñọ ama osop, ndien ke akani ukpep-ñkpọ mme Jew eda owo emi ekemede ndikot enyiñ oro nte idioñọ Messiah.

Akpan enyiñ Abasi efen ke Akani Ediom edi Adonai, edikabare esie edi Ọbọñ (ewet ke ñkpri leta). Ewet enye itie 300 ke Akani Ediom ndien akamba ubak ada ọnọ uwak ke ntak mbuot Abasi ita ke kiet. Owut ete ke enye emi ekotde enyiñ emi edian edi ata andinyene, me, andikara, ndien ọwọrọ unyime ñkop-item ye nsuhọre-idem ọnọ enye emi Enye adade anam ñkpọ. Esisit ini ke Akani Ediom ekot enye ke enyiñ kiet; ndien mmọ emi ñko edi nti ediyarare ke ukpep-ñkpọ Abasi ita ke kiet. Psalm 110:1 edi ata akpan uwut-ñkpọ ke ndikot ntre. “QBQÑ (**Jehovah**) ọdọhọ ye Ọbọñ mi (**Adonai**).” Ke Matthew 22:44 ye Mme Hebrew 1:13 nnyin ikot ntem ite ke Jesus edi Enye Emi QBQÑ Jehovah etiñde abaña. Mi, ikọ emi **Adonai** ekot enye ikpọñ sia enye miwọrọke mbuot Abasi ita ke kiet, edi edide Jesus Christ ke Idemesie nte owo kiet.

Elohim, El-Shaddai, ye **Jehovah** enyene ebuana akpan-akpan ke mbuot Abasi. Ke **Elohim** edi odudu ye uboñ Idemesie. Ke **El-Shaddai** edi ntat-ubok ke eno ye andino mme odudu, mme eno, mme edidiñ ye ediñwum mfri ke utom. Ke **Jehovah**, Enye ke Idemesie edi Abasi edinen-ido, edisana-ido, ima ye ufak. Edi **Adonai** owut usuñ efen eke nnyin inyenede ebuana ye Abasi, onyũ ono nnyin unen, ke isukde ibuot, inyũ inamde utom akan kiet ekeledi ke otu mme enyĩ eken.

Edi ñkpọ ndyọ ye inemesit ke ukpọñ ndifiok se enyĩ iba emi Elohim ye Jehovah eworode nte ewetde ke ofuri Akani Ediomu ke esiode Exodus 6:3 efep. Mme mkposon ñwed ikọ Abasi ye mbuk eset emi ewetde eno Israel saña-saña, utọ nte Joshua, Judges, Samuel, ye Ndidem, ewet enyĩ emi Jehovah ekan enyĩ efen. Mme ñwed emi enyenede ofuri ererimbot, utọ nte Ecclesiastes, Daniel ye Jonah ekpere ndiwet enyĩ emi Elohim awak akan. Psalm 42 tutu osim 84 ñko ekpere ndiwet Elohim ikpọñ-ikpọñ, ke ini mme Psalm efen ke ediwak itie ewetde Jehovah. Kpukpru emi edi ñworo-nda ikọ inyũ idighe mme nsio-nsio usuñ emi mme andiwet emade ndida, koro se ewetde ke Psalm ke mme itie iba oro etiñ abaña David. Enye edi ukpohore ke ekikere ye uduak Abasi.

Uduak Abasi ke kpukpru edinam Esie ye owo edi ndiduri owo kiet-kiet nno Idemesie. Enye ayarare Idemesie ke nsio-nsio usuñ ndinam se ededi man ada esit owo, kpa owo emi ama ekeneñere odiok, ono Idemesie. Uduak Abasi ke ndino ye ndimen ufen mfep ekedi man anam Pharaoh akabare esit, Israel enyũ esaña ekpere Abasi man ofuri ererimbot efiok ete ke Enye edi Abasi odudu kpa **ata Abasi kierakiet**.

Abasi akada Moses anam utibe-ñkpọ ndiwut ndito Egypt odudu Esie. Mme mbia-idiñ ke ison Egypt ñko ema ewut ete mmimo imenyene odudu emi akande ifiok owo, okposuk edi oro midighe odudu Abasi. Edi Abasi ama akan kpukpru, koro urukikot emi akakabarede oto ke esan Aaron ama emen kpukpru mmọ eken mbemiso enye afiak akabare edi esan. Ntak iduhe ndiyik odudu Abasi me ukeme Esie ndisana nduk nnyũ nda mme owo nnam ñkpọ, edi Pharaoh ama oson esit esie ye Abasi Israel. Edieke owo esinde mfon, esit esie akabare oson. Kpa ukem **Utin Edinen-ido** emi anamde mbit-mbit okposon esit emem, emi akananam mikopke ufiop emi otode uñwana utin, eyenam esit mbat oson, onyũ anam enye oson nte itiat. Ntre ke ekedi ye Pharaoh, emi okosonde esit esie ye Abasi ke ata ediwak ini tutu mme utibe-ñkpọ, ye anana-utit mfon Abasi andikpon ñkan ikekemeke ndisim enye.

MME MBUME

- 1 Abraham okodiño Abasi ke enyĩ ewe?
- 2 Nso enyĩ ke Abasi okono Israel ndida mfiok Enye?
- 3 Nte Abasi ama okop akam ndito Israel?
- 4 Nte Abasi ama efre ediomu Esie ye Abraham?
- 5 Ntak emi Abasi okoyomde ndinam Israel ebho minyũ idaha itoro ino owo ke ndinam ntre?
- 6 Ntak emi Israel mikosopke ndinam uyo emi Moses eketinde ono mmọ?
- 7 Nso utibe-ñkpọ ke Abasi ekebe ke Moses anam ke iso Pharaoh?
- 8 Nso ikedi uduak utibe-ñkpọ emi?
- 9 Nso ikotibe ke ema ekenam utibe-ñkpọ emi?
- 10 Nso ikedi edu-uwem Pharaoh ke abaña utibe-ñkpọ emi?